



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

ბოდორნის არქეოლოგიური ძეგლები

ბოდორნის არქეოლოგიური ძეგლები, მრავალფენიანი არქეოლოგიური ძეგლი სოფ. ბოდორნაში (დუშეთის მუნიციპ.).

გათხარეს 1977-78 (ხელმძღვ. რ. რამიშვილი). აღმოჩენილია მტკვარ-არაქსის კულტურის თიხის ჭურჭლის ფრაგმენტები, გამოვლენილია ადრინდ. სამინათმოქმედო კულტურისათვის (ძვ. წ. IV ათასწლ. I ნახ.) დამახასიათებელი მასალა: თიხის ჭურჭლის ნატეხები, ობსიდიანის იარაღი, ქვის ხელსაფეკვავი, აგრეთვე ცხოველის ძვლები. ზოგიერთი ჭურჭელი არაგვის ხეობაში, შიდა (ხელთუბანი) და ქვემო ქართლსა (წოფი, სიონი) და კახეთში (ულიანოვკა) აღმოჩენილი მასალის მსგავსია. გათხრილია III-IV სს. ორმოსამარხები, რ-ებშიც იყო ვერცხლის აბზინდები, ოქროს საყურე, რკინის დანის ფრაგმენტი, სარდიონისა და სადაფის მძივები, მინის ჭურჭლის ფრაგმენტი, ხოსრო I-ის მიერ 549-550 მოჭრილი მონეტა და სხვ. ამავე დროის კულტ. ფენაში აღმოჩნდა გვიანდ. არმაზული - ადრინდ. შუა საუკ. თიხის ჭურჭლის ნატეხები.

ლიტ.: რამიშვილი რ., მ., ჯორბენაძე ვ. ა., მარგველაშვილი მ. და დრ., Археологические исследования в Арагвском ущелье, კრ.: Полевые археологические исследования в 1977 году, Тб., 1980.

გ. ჩიქოვანი
